

P. VERGILI MARONIS

sanguineisque inculta rubent auiaria bacis. 430
 tondentur cytisi, taedas silua alta ministrat,
 pascunturque ignes nocturni et lumina fundunt.
 et dubitant homines serere atque impendere curam?
 quid maiora sequar? salices humilesque genistae,
 aut illae pecori frondem aut pastoribus umbram 435
 sufficiunt saepemque satis et pabula melli.
 et iuuat undantem buxo spectare Cytorum
 Naryciaeque picis lucos, iuuat arua uidere
 non rastris, hominum non ulli obnoxia curae.
 ipsae Caucasio steriles in uertice siluae, 440
 quas animosi Euri adsidue franguntque feruntque,
 dant alios aliae fetus, dant utile lignum
 nauigiis pinus, domibus cedrumque cupressosque;
 hinc radios triuere rotis, hinc tympana plaustris
 agricolae, et pandas ratibus posuere carinas. 445
 uiminibus salices fecundae, frondibus ulmi,
 at myrtus ualidis hastilibus et bona bello
 cornus; Ituraeos taxi torquentur in arcus.
 nec tiliae leues aut torno rasile buxum
 non formam accipiunt ferroque cauantur acuto, 450
 nec non et torrentem undam leuis innatat alnus
 missa Pado, nec non et apes examina condunt
 corticibusque cauis uitiosaeque ilicis aluo.
 quid memorandum aequae Baccheia dona tulerunt?
 Bacchus et ad culpam causas dedit; ille furentis 455
 Centauros leto domuit, Rhoecumque Pholumque
 et magno Hylaeum Lapithis cratere minantem.
 O fortunatos nimium, sua si bona norint,
 agricolas! quibus ipsa procul discordibus armis
 fundit humo facilem uictum iustissima tellus. 460
 si non ingentem foribus domus alta superbis
 mane salutantum totis uomit aedibus undam,